



Broj: 04-40-1-200/25
Sarajevo, 20.07.2025. godine

Na osnovu dobivenih i obrađenih informacija od: općinskih operativnih centara civilne zaštite, Federalnog hidrometeorološkog zavoda, JU Zavoda za hitnu medicinsku pomoć Kantona Sarajevo, JU Zavod za javno zdravstvo Kantona Sarajevo, MUP-a Kantona Sarajevo, BIHAMK-a i drugih struktura zaštite i spašavanja formiranih na području Kantona Sarajevo, dojava građana, a u skladu sa članom 152. Zakona o zaštiti i spašavanju ljudi i materijalnih dobara od prirodnih i drugih nesreća („Službene novine Federacije BiH“, br. 39/03, 22/06 i 43/10) i čl. 14., 17. i 19. Pravilnika o organiziranju i funkcioniranju operativnih centara civilne zaštite („Službene novine Federacije BiH“, broj 9/19) dostavljamo Vam:

REDOVNI IZVJEŠTAJ
za period od 08:30 sati 19.07.2025. do 08:30 sati 20.07.2025. godine

Kantonalna uprava civilne zaštite Kantona Sarajevo: Pripadnici Profesionalne vatrogasne jedinice Kantonalne uprave civilne zaštite Kantona Sarajevo u izvještajnom periodu imali su 13 intervencija. Sedam intervencija se odnosi na obezbjeđivanje tankovanja goriva na Međunarodnom aerodromu „Sarajevo“, četiri na gašenje zapaljenog niskog rastinja, jedna na gašenje zapaljenog pomoćnog objekta (šadrvana) i jedna na gašenje zapaljenog otpada u kontejneru.

Općinski operativni centar civilne zaštite Stari Grad: Općinski štab civilne zaštite Stari Grad organizovao je 24-satno osmatranje terena na ugroženim područjima od klizišta, lokalitetima Curine njive, Knjeginjac i Bistrički potok u cilju osiguranja provođenja pravovremenih mjera zaštite stanovništva (pravovremenog upozoravanja i evakuacije, ukoliko to situacija bude zahtijevala) i infrastrukture. Uposlenici Službe civilne zaštite Općine Stari Grad Sarajevo, terenskim obilaskom navedenih lokacija dana 19.07.2025. godine, utvrdili su slijedeće stanje:

1. Curine njive (Opština Istočni Stari Grad i Općina Stari Grad Sarajevo – Bostarići):

Utvrđeno je da je dotok vode iz tri pravca podnožja deponije i dalje prisutan te se ulijeva u postojeći drenažni kanal. Taj dotok je konstantan i naročito izražen nakon padavina, ali trenutno bez znakova zadržavanja vode na površini igrališta. Daljnjim pregledom terena, posebno u donjem dijelu lokaliteta, ispod igrališta, u prethodnom izvještaju bilo je uočeno proširenje nekoliko ranijih pukotina, trenutno nema daljih znakova deformacije. Uz to, primijećeno je blago slijeganje pojedinih dijelova zemljanog tla, što može, ali i ne mora ukazivati na početne procese pomjeranja terena, posebno s obzirom na promjenjive vremenske prilike (učestale padavine praćene kraćim sušnim periodima). Na istom dijelu terena uočeno je osipanja zemljane mase, neposredno ispod nivoa igrališta, što dodatno zahtijeva pojačan nadzor. Međutim, na prostoru igrališta, tačnije u zoni sonde za mjerenje kretanja klizišta uočena je deformacija tla u vidu slijeganja jednog dijela terena.

Na prostoru iznad rasadnika, tlo je i dalje natopljeno vodom te je vidljiva blaga erozija pukotina. Nastaviti svakodnevni nadzor, s akcentom na jutarnje i večernje sate, kako bi se na vrijeme uočile eventualne promjene na starim pukotinama i zonama gdje je došlo do slijeganja tla.

U ulici Ablakovina čikma na br. 21 prijavljeno je da se iza stambenog objekta pojavila voda.

Ocjena rizika: Lokalitet je ocijenjen kao uslovno kritičan zbog geoloških procesa, te zahtijeva kontinuiran nadzor.

Knjeginjac (Opština Istočni Stari Grad):

Nije zabilježeno novo odlaganje građevinskog materijala. Uočeno je slijeganje postojećeg deponijskog materijala uz početne znakove erozije, što ukazuje na postepenu konsolidaciju tla i uticaj atmosferskih faktora. U donjem dijelu deponije i dalje je vidljivo prisustvo vode, što upućuje na nedovoljnu kontrolu površinskih i podzemnih voda.

Prilikom obilaska lokaliteta deponije Knjeginjac, vizuelnim pregledom je utvrđeno da na gornjoj površini deponije nema značajnih promjena u odnosu na prethodne dane. Nisu uočena nova dovoženja zemljanog niti drugog materijala, a u rigolu iznad ceste nije zabilježeno prisustvo vode. Međutim, u donjem dijelu deponije vidljivo je povećano prisustvo vode, uslijed čega su se formirale plavne površine većeg obima, kao i blatnjavo tlo. Također je uočen konkretan dotok vode u obliku manjeg potoka, koji se slijeva iz jednog pravca niz padinu u donji dio deponije. Pojačati nadzor nad donjim dijelom deponije, posebno nakon padavina, kako bi se pravovremeno uočile promjene u protoku i zadržavanju vode.

Ocjena rizika: Slijeganje deponijskog materijala i erozija uslijed atmosferskih uticaja.

2. Bistrički potok (Općina Stari Grad Sarajevo – Boguševac i Opština Istočni Stari Grad):

Korito potoka je i dalje djelimično zatrpano zemljano-kamenim materijalom i obrušenim stablima. Nisu evidentirane nove degradacije, niti su poduzete aktivnosti na uklanjanju postojećih prepreka. Prilikom obilaska terena duž toka Bistričkog potoka, konstatovano je da nema zastoja u protoku vode na dijelu od naselja Boguševac prema Latinskoj ćupriji. Voda se kreće kroz korito bez vidljivih prepreka ili prelijevanja. U gornjem dijelu potoka, koji administrativno pripada općini Istočni Stari Grad, još uvijek su prisutni oborena stabla i urušene stijene u koritu, naročito u blizini objekta u izgradnji (Trebević Hills). Te prepreke se nalaze u samom koritu i mogu otežavati prirodan tok vode tokom intenzivnijih padavina.

Ocjena rizika: Povećana opasnost od plavljenja u slučaju obilnih padavina, akumulacija nanosa uzvodno od začepljenja, u slučaju obilnih padavina mogućnost erozije obale uslijed promijenjenog toka vode.

3. Evakuacija stanovništva sa ugroženih područja:

Na osnovu Naredbi Štaba civilne zaštite Kantona Sarajevo (br.08-40-1128-2/24 od 01.11.2024.godine i br.08-40-1128-2.1/24 od 20.11.2024.godine), kao i Planova evakuacije Općine Stari Grad Sarajevo, Služba civilne zaštite redovno obilazi naselja Bostarići, Ablakovina i Ablakovina čikma.

U toku su procjene rizika i pripreme za eventualno izmještanje stanovništva u sigurnije objekte, koje će osigurati Općina Stari Grad Sarajevo.

Iz ostalih općinskih operativnih centara civilne zaštite s područja Kantona Sarajevo, kao i od drugih davalaca informacija nisu dobivene relevantne informacije koje se odnose na prirodne nesreće ili druge pojave koje ugrožavaju živote i zdravlje ljude, kao i materijalna i kulturna dobra.

Elektro distribucija Sarajevo: Snabdijevanje potrošača električnom energijom na području Kantona Sarajevo je uredno, osim pojedinih područja koja su bila planski isključena zbog izvođenja neophodnih radova na održavanju energetskih postrojenja.

KJKP Sarajevogas: Svi potrošači u Kantonu Sarajevo su uredno snabdjeveni prirodnim gasom.

KJKP Vodovod i kanalizacija: Vodosnabdijevanje u Kantonu Sarajevo je uredno, osim u dijelovima pojedinih naselja gdje se vrše planske popravke kvarova na vodovodnoj mreži.

Federalni hidrometeorološki zavod: Jutros u 08:00 sati temperatura u Sarajevu na mjernoj stanici Bjelave je iznosila 21°C, vlažnost zraka 59%, barometarski pritisak 939,7 hPa.

BIHAMK: Saobraćaj se na području Kantonu Sarajevo odvija uredno, osim na dionicama gdje se izvode planirani radovi na kojima se saobraćaj odvija po posebnom režimu.

Zbog održavanja manifestacije "Ilijaški dani 2025", u vremenu od 10:00 do 24:00 sata obustavljen je saobraćaj u ulici 126. Ilijaške brigade.

Prema informacijama prikupljenih od dežurnih dispečera i informativnih službi KJKP GRAS, Centrotrans – Eurolines d.d. i JP Željeznice Federacije BiH, gradski, međugradski i željeznički saobraćaj se odvijaju po redu vožnje.

PO OVLAŠTENJU DIREKTORA
ŠEF CENTRA

Fahrudin Pribišić

Dostavljeno:

- Predsjedavajućem Skupštine Kantona Sarajevo
- Premijeru Kantona Sarajevo
- Direktor KUCZ Kantona Sarajevo
- Komandantu Štaba CZ Kantona Sarajevo
- Federalnom operativnom centru civilne zaštite
- a/a